


Atuagaq nutaaq

Tarramik ujarlernertut


Hal: Taallanik soqutiginnilluni sammisaqarnerup ukiut marluk pingasut matuma siorna Nuummi "Taallanik atuaqattaarnermik" taallugu ingerlanneqartup kinguneri suli takkutillattaapput. Maanna kingullertut saqqummerpoq taamani ukiut arlaanni taalliaminnik atuaaqataasut ilaat Arnajaaq Lyngé. Atuakkanik naqiterisitsisarfik Forlaget Atuagkat aqqutigalugu taalliai ataatsimut taasat "Nattoralik Marloralik", siorna ukiup naanerani naqiterlugit inertut, maanna takullugillu atuarsinnaalerpavut.



Taallat ataatsimut isigalugit oqaatigisagaanni suliaanermikkut tamarmik eqqarsaatigilluagaallutillu oqaasertamik kut eqaatsumik suliaapput. Tassuuna taalliortoq nersortariaqarpoq, oqaatsinik oqariaatsinillu misileraasutut illuni eqqarsaatini saqqummiuppai, allaat taallani ilimanangitsuusaani oqaatiginiakkat itisuut toqqortarisarlugit. Ilimanarpoq ukiuni arlalialunni taalliani misissoqat-taarlugit oqaasertaat iluarsaateriarlugit

iluarsaateqqittarsimagai. Taamaaliorami iluatsippoq oqaatsillu eqaassusii paasisimallugit.

Taalliortoq arnaavoq, ilisimasakka naapertorlugit, aammalu ilinniarfissuar-mi ilinniarallarnerata nalaani, taalliornermik soqutigisaqarnini inuusuttuaraallunili ingerlatilersimavaa. Saqqummiussaa-ni tiguartinnarpoq inuttut inuunermini, immaqalu ineriartornini ilutigalugu, sumiffeqanngitsutut misigisimanini oqaasertalerniartarmagu "tarraq" assiliartali-ullugu. Taallami siulliit ilaanni imminut misigitinniarsarluni oqaatigisarpaa "soorlumi tarraasunga", taggisaasaq II (-su-) atoriarlugu pisimasorsiummut nuut-tarpaa, imaalilugu "tassami tarraagama". Taallaq taanna tiguartinnartuuvoq peq-qutigalugu inuup misiginera, immaqaa inuppassuarni ilisimaneqartoq, ersersin-iarneqartutut immat, soorlu arnap angu-tillu akornanni, qatanngutit akornanni, inoqatit akornanni. Inooqataaniarluni, kisiannili ima sumiginnagaatigaluni, al-laak malugineqassanani, tarraq nalingin-naasumik pingaarnerutillugu isiginiarne-qarneq ajormat. Taamaattorli tarraq inummik malinnittuarpoq, inoqatilli inut-tavia takusarnerpaat, imaluunniit soquti-ginartumik inuunilittut paasisarnerpaat, "soorlumi tarraasunga / tununnit malit-tuarlutit / qaamanerup malittuakkavit / tununnut inissittaraanga (..) soorlumi tar-raasunga".



Taallamili allami imminut oqaatigivoq "Tarraangilanga". Kingumut tassani oqaatsip tarnikkut misigissutsinut assilisatut atorlugu iluassusia taalliortup oqaatiginiakkaminut sakkortusaatigaa, soorlu "marloqiusaavunga igalaami / marlo-qiusaavormi igalaaq / (..) uangali arlari-uvunga / kinaassutsikka arlariupput". Qulliup qaamanermini inuk tarralersor-tarpaa arlalinnik, kisiannili taakkua tamarmik tarraapput inuup tarraniittup ki-naassusia aggulunnagu, taamaattorli ili-vitsutut isikkunitsillugu, takutittarlugu. Inullit tarraanngitsooq misigissutsinik nammineq pigisaminik ulikkaarpoq tarrartaa-nut ilanngutinngitsunik, "ulussamali kis-sarnerata / kaneq igalaamiittoq aatsip-paa / soorlu qulliit tununniittut kuuttut / tarrara tarrilersillugu / nuisappulli qulli-ikka kuuttut / ulussanniittut / tarrippulli tarramma nungunnerani / (..) kiserngor-uppoq uanga timera..".


Taallami allami qulequtalimmi "Anni-arpunga" inuit marluk imminut pissusi-lersorfiginerat oqaatiginiarneqarpoq. Soorluli tarraq atorlugu assiliannngortits-

Arnajaaq Lyngé
Nattoralik Marloralik



ineq nangeqqillugu inuttut asaqatigiin-
nerup iluani pissusilersorfiginerit iluarsi-
nissaat eqqartorneqartoq. Inooqatigiin-
nerup pisussaaffii, asasap asasaminut, eq-
qartorneqaratik qaangiataaginnarneqar-
tillugit periarfissaq tassaavoq oqaloqati-
giinnissaq aallariaataasumik kingune-
qartussa. Sivitsortumik tamanna pisi-
mannngimmat taalliortup 'anniaatit' taa-
vaa taallatullu oqaatigalugu, piumasa-
risutut illugu aammattaaq uparuartorne-
qarnissani, immaqa namminissarsiorpal-
laalernermigut, "anniarpunga / tamatigut
eqqarsarninni / tamatigut najuunninni /
tamatigut takusininni..", taamaattumik pi-
umasaq angisooq saaffigisamut oqaati-
gineqarpoq, "ilinnut artorsaataagaluar-
tunga tigungna / oqaluullungalu taama

ittunga / eqqortuliunngisaannarumaar-
tungalu."



Taallat ataatsimut isigalugit inuup isu-
maliutersornermik nuannarisallup sulia-
rai, inuuneq nalinginnaasoq ersertarpoq,
kisiannili aamma immiut qimattutut il-
luni suut tamaasa qulaanit isigisutut
oqaatiginiartarlugit. Pissutsit assigiinngit-
sut sammisaapput, inummot ataasiinnar-
mut pinnatik, aammali pinngortitamik
Guuteqarneranillu isumaliutit ilaallutik.

Taallat pigalugit sammissallugillu isu-
maliutinik pissarsivissat iluatinnartut.
Taalliortup nammineq qalipatani assili-
artaliussorsimavai, saqqaaniitlorlu isigi-
lerlugu nuannerpoq, arnap atisaqan-
ngitsup titartarnera, assigaali kiinaq qu-
ngujulalluni ilinnut sammisoq.

Arnajaaq Lyngé:
Nattoralik Marloralik

ISBN: 978-87-90133-67-2
Qupp. 60, akia 148 kr.

Assiliartaluk taalliortup nammineq qali-
pagaanik.

Forlaget Atuagkat 2009